

Bunita celebracion di Dia di Portugal

Minister De Meza: “Ami tambe ta Portugues”



ORANJESTAD – Ayera tardi Wilhelmina Park a bisti di gala pa comunidad Portugues por a celebra nan Dia Nacional di Portugal of Dia di Luis vas de Camoes. Pero tabatin un motibo mas di peso pa e celebracion aki a bira uno masha special e aña aki. Ta asina cu e comunidad Portugues na Aruba ta celebrando 50 aña di existencia.

E celebracion aki a conta cu presencia di Gobernador encarga sra. Ella Tromp-Yarzagaray; Presidente di Parlamento di Aruba, sra. Marisol Lopez-Tromp, Prome Minister encarga, sr. Mike de Meza, demas dignatario, cuerpo consular, miembronan di e comunidad Portugues y invitadonan en general.

Durante e celebracion aki a wordo relata un historia breve di e celebracion aki na Aruba, y un biografia di Luis Vas De Camoes kende ta autor di e frase famoso: “Enfin bida lo caba, tur lo mira cu ami tabata amigo di mi patria y cu lo mi prefera no solamente di muri na mi patria pero cu mi patria”.



E celebracion aki a cuminsa na aña 1965, caminda e Portugues sr. Aventura Quimaraes a cuminsa cu e celebracion di Dia Nacional di Portugal na Aruba. Sr. Quimaraes kende tabata un artista y welderdo profesional a bin hunto cu un grupo di Portugues cu e iniciativa aki. 50 aña pasa un grupo chikito di Portugues a realisa un marcha saliendo fei cas di sr. Quimaraes pa Wilhelmina Park.

Reconocimento

Un grupo di 11 ciudadano mayoria di nan di origen of di descendencia Portugues a ricibi un reconocimiento pa e

labor cu nan a yega di realisa na beneficio di nan comunidad. Sra. Yubita Andrades a destaca e humildad, respet y valor humano di e Portuguesnan cu a bin establece na Aruba, lagando nan sernan keru atras. Pero cu perseverancia y esfuerso e comunidad Portugues a profila nan mes hopi bon den tur sector di nos pais contribuyendo na nos economia. Te hasta minister de Meza den su discurso como Prome Minister encarga a bisa cu su ancestro tabata Portugues tambe. El a relata cu su bisawela y bisawelo ta di Portugal cu a bini 150 aña atras via Sur America pa establece na Aruba y Corsou. “Cu honor mi por bisa cu awe pa di dos termino consecutivo tin un persona cu sanger Portugues cu ta vice-Prome Minister di Aruba, pasobra ami tambe ta Portugues”.

El a referi cu e Portugues ta un comunidad cu historicamente a integra masha positivamente na Aruba. Un comunidad respetabel cu honor, cu semper a forma parti grandi di comunidad, economia y bida socioeconomico di Aruba. Igualmente den nomber di Premier Eman, minister de Meza a expresa un caluroso pabien na tur Portugues y descendientenan Portugues cu ta biba na Aruba. □